



CH-7144 Vella, 04/12/2015

Novitads dalla suprastanza communal

Surbaghegiada Palius/Vella

A caschun dall'occurrer d'informaziun dils 5 d'october 2015 ei l'idea d'in object plurivalent per integrar la stizun dil vitg Vival, localitads per ina pratica da miedi e habitaziuns vegnida presentada alla populaziun. Silsunter ha la suprastanza communal surdau a Gion A. Caminada l'incumbensa per la planisaziun d'in project.

Punt da sugas denter Pruastg e Silgin

Ils 2 da november 2015 ei la Punt da sugas sur la Val Dadens da Silgin che colligia la senda da viandar da Vrin a Surcasti vegnida aviarta. La punt remplazza il tschancun dalla senda ch'ei instabila e prigulusa. Ils cuosts muntan a strusch CHF 100'000.

Sanaziun via cantunala a Valgronda

Igl Uffeci da construcziun bassa dil cantun Grischun preveda d'entscheiver igl onn 2017 a sanar la via cantunala a Valgronda. Medemamein duei in passapei vegnir eregius en quei liug entras la vischnaunca.

Project da separar las auas piarsas schubras e tschuffas a Morissen e Degen

El rom dil plan general per la separaziun dallas auas existan pendenzas dils vischinadis da Degen e Morissen che ston vegnir rugaladas proximamein per salvar il dretg da subvenziun tier il cantun. La suprastanza communal ha surdau las lavurs da projectar las lingias da deviazion separadas dallas auas piarsas els dus loghens.

Casetta da spetga per la fermada da posta a Vrin/Crusch

A Vrin/Crusch vegn ina casetta da spetga per la fermada da posta construida. Dacuort ei vegniu entschiet cun las lavurs.

Fittanza da terren dalla parcella nr. 3457 a Morissen

La suprastanza communal ha decidiu da dar a fittanza a Simon e Tanja Osterwalder-Baumgartner ina part dalla parcella nr. 3457 naven digl 1. da schaner 2016 per in cuoz da 30 onns. La surfatscha sesanfla dalla vart sut dalla via communal e cumpeglia 624 m².

Cunvegrientscha da prestaziun cun la Regiun Surselva

La suprastanza communal ha approbau ina cunvegrientscha globala per surdar alla Regiun Surselva diversas incumbensas existentas. Ei setracta da menar e cofinanziar purschidas da formaziun e terapias, dalla scolaziun da carschi e dalla finanziaziun da museums. La cunvegrientscha vala pigl onn 2016 e vegn silsunter remplazzada entras cunvegrientschas per singulas prestaziuns. Ina secunda cunvegrientscha pertucca il management e svilup regional e vegn serrada giu per il cuoz dad 8 onns.

Segirtad da traffic a Vella

Sin iniziativa da vischinas e vischins da Vella vegn previu da postar in spiegel da traffic en cumbinaziun cun in signal da stop per la via d'access sper la caplutta da S. Roc. La damonda corrispudenta ei pil mument pendent tier igl Uffeci da polizia dil cantun Grischun.

Tablas da signalisaziun Lumnezia

La suprastanza communal ei lundervi da sclarir la tematica dallas inscripziuns dallas tablas da signalisaziun per liung dalla via cantunala, las qualas pertuccan la vischnaunca Lumnezia e cuntengnan per gronda part nums da vischinadis. Medemamein vegn iu suenter a l'applicaziun davart ils loghens da destinaziun che vegnan illuminai els autos da posta.

Deponias selvadias per curdems

La suprastanza communal ei vegnida confruntada differentamein cun reclamaziuns pertuccont curdems che vegnan deponi illegalmein ella natira. Igl uffeci cantunal dalla natira ed ambient va suenter alla problematica cun la finamira da procurar per remedura.

Eleccziun d'in vicecumandant da pumpiers per la secziun Suraua

Sin proposta dalla cumissiun da pumpiers ha la suprastanza communal elegiu Ursin Bundi sco niev vicecumandant per la secziun Suraua. Igl officier dalla secziun Lumnezia-dado ha gia exequiu la lavur sco menader dils pumpiers da Suraua naven dil 2014.

Sustegns finansials

La suprastanza communal ha dau suatientscha allas suandontas damondas per sustegn finansial:

- exposiziun Agrischa 2016 a Glion,
- fiasta da giubileum da 25 onns Musica giuvenila Lumnezia che ha liug ils 19 da december a Vella,
- giubileum da 60 onns Club da skis Sezner,
- concerts dil Chor Romontsch dalla scola cantunala en connex cun la lavur da matura ha Petra Cavegn; ils concerts han liug ils 2 e 3 d'avrel 2016 a Vella,
- secunda ediziun dil cudisch „Deletgs culinars“ da Pierina Cabalzar-Caminada,
- ediziun dil Calender Romontsch 2016.